

歷代 日記叢鈔



學苑出版社

歷代日記叢鈔

第一四二冊

(清) 杜愈撰

吳船日記

吳
船
日
記

光緒丁未年三
月重刊於姑蘇

吳船日記

光緒二十二年四月奉中丞趙公面諭出省查看水陸各軍留防太湖水師正前營許游擊國祥派來小長龍一號爲座船舳板四號領哨都司徐發祥哨官四員爲守備陳名揚把總張銘耀符士松六品軍功楊克昌又城守曾叅將毓衢派來撫標中營水師舳板二號爲都司黃一桂六品軍功袁紹箕黃一桂字子馨爲中營幫帶熟悉吳江震澤一帶地勢情形陳名揚於蘇省水道甚詳凡幹河支津皆能言之人亦樸慎耐勞

初五日由覓渡橋營次登舟起程九里至寶帶橋府城南十五

里當澹臺龐山諸湖之口屬元和縣界中丞於每年春秋二季
在此閱水操橋工甚鉅九里尹山湖駐有留防右營右哨十隊
六品軍功邱逢吉九里夾浦駐有右營左哨三隊譚復俊譚初
在霆軍後從曾文正至淮北皆無戰功而官至游擊問以曾鮑
兩軍攻取之地皆不了了浦南九里同里鎮有釐金總局右營
七隊六品軍功王有才駐焉又鹽捕營江震岸巡領哨及江震
鹽公堂均駐於鎮本梟匪盜賊窩頓及光蛋聚賭之所夾浦十
八里至吳江震澤兩縣城前由吳江縣稟請撫標中營水師三
號駐防一駐縣東門外三江橋一駐北門外三里橋一駐東門
外七星橋縣城東北距塘河約里許西南數里卽太湖係鹽販

出入要口哨官中有彭書麟者頗英爽上年隨陳舫仙方伯駐大高嶺老君堂等處詢以遼南地利頗能詳盡陸師中出色將弁也然在陳軍並未重用因和議成來此 吳江爲蘇浙之咽喉縣西數里卽太湖東門有長橋蓋分太湖之流而東出者二七十里八坎鎮亦爲出太湖要口駐有右營三隊兩江補用游擊鄧炳發自言隨曾忠襄公至山海關問以忠襄駐師何處而忘其地名劉勇介兵數多寡皆不能對且謂其時軍不多係辦賑務詰以忠襄辦賑在山西至駐師榆關本爲防俄回馬寨秦王島老龍頭紅花甸等名可能知其一二亦不能答 九里磯臺六里三里橋三里宿平望屬江震兩縣界該鎮數里外卽太

湖右營管帶劉榮盛駐防有長龍一督陣舢板一五品軍功章
鑑前又左哨七隊五品軍功彭鶴樓皆駐此又新中營舢板四
哨官爲宋永興董紫文郭連宏劉孝尊 國初徐養浩曰平望
爲江浙之要衝東南有事水陸之師必至焉又曰右爲鶯湖左
爲雪湖百夫守之萬騎不能前也

初六日由平望開行十二里梅堰湘軍前營右哨兩隊駐防哨
官爲補用游擊文忠能患病未出見八坎礮臺平望梅堰四處
均係鹽梟出太湖要口該匪名曰出塘河二十四里至震澤鎮
向爲盜賊梟匪出沒之所地近太湖江浙毗連故多窩頓於此
湘軍前營管帶唐逢治自率勇丁八隊駐此外駐有右營水師

左哨八隊夏占鰲新中營中三張光瑤左三羅先海左六張鎮國左七陳敬槐 吳江震澤皆以蠶絲爲業地方豐富每蠶市罷後各有贏餘性好博戲外來游匪謂之光蛋開場聚賭互相引誘千百爲羣匪黨四集而劫掠經中丞嚴拿數人正法此風近熄 頗聞太廟港地僻瀨湖最關緊要計由鎮赴港約二十里港狹橋低舢板不能出入乃換坐槍船西行其最狹之港曾不容舢廟內駐有湘軍前營後哨勇丁五隊哨官叅將劉賢嗣年已六十餘齒髮皆落哨長守備謝光獻出港望之約三十里爲東山與西山起伏隱約相爲連續港東約三十里至橫扇湘軍前營前哨哨長千總周朝昇駐防西至湖口爲陸家港亭子

港烏婁烏牛因度村等處與浙江鴨村交界浦淑交錯汊港紛歧盜賊得以出沒官軍來捕則散逸港內追捕至港則又出港渡湖而登山無從弋獲也自某統領用盛永勝王康南爲江震岸巡謬思以盜治盜該兩人廣收徒衆縱令聚賭土民漸多入幫既有藏身之固來去自由難以稽禁現經中丞極力整頓萑苻斂跡巡防勇丁難保不事久生懈尤宜思患預防廣布耳目嚴辦窩頓以清其源曾以此語諄諄誡各營員弁云是日仍由港返鎮聞南潯市井最盛從前江浙盜賊麀聚蟻附皆以此爲總匯兩省交界太湖毗連而浙省巨富多在此鎮故地方尤爲煩劇乃由震鎮繞赴南潯一視計程十二里屬烏程縣駐有浙

江楚軍水師新左營又巡鹽水師一營出南潯數里卽宿

初七日開行計由南潯至烏鎮三十六里明時倭寇徐海內犯蘇松之故道由硤石阜林出烏鎮以北蓋亦要地也十五里至三江匯三里至嚴墓駐有湘軍前營右哨三隊哨長千總周開泰新中營駐有舳板數號舟至此仍折回三江匯向盛澤進發距嚴墓九里許名爛溪俗呼壇邱屬震澤與吳江交界地僻多盜上年李質廷統領擒董大洪處五里過獅吼橋右營右哨四隊六品軍功彭福田駐此二十二里至盛澤因櫓損壞在此修理宿焉駐有前營中哨一隊前哨三隊右哨二隊幫帶補用副將毛上勝率差弁守備唐生春千總唐生林駐此又駐有新中

營槍船前六師立壽前七李雲 張遼徐晃不睦趙儼並參三軍而前忿盡蠲古營務處之職也衆議舉向寵爲督而武侯決其能行陣和睦優劣得所古統領兼營務處之職也營務處職在薦賢以辦事儲材以備用宣布上意通達下情然營務處於各營官雖有節制之名實無統轄之權崖岸太峻衆謗羣疑界限全無啟寵納侮應付輕重殊難得宜

初八日由盛澤發二十二里至三里橋駐有右營右哨九隊守備銜千總章芹雲南人係劉景韓中丞官浙藩時函調來者後升豫撫轉薦朱煥文總鎮委帶此船曾至興化宣光問以劉淵亭在越南屢立戰功何以岑軍出關反寂寂無聞答曰劉軍携

眷擾民無復紀律襄勤禁之又乏餉官軍不能接濟是以軍無
鬪志問岑軍諸將何人能戰答以丁衡三槐最勇云云 鮑春
帥馭軍無紀而能屢殲悍賊劉淵亭挈眷擾民而能獨當大敵
兵事變化誠不可一概論乎然治軍終以明法爲本不擾民乃
能衛民不可藉口一時名將效其所爲也 劉淵亭爲三宣提
督時與法人戰見可則進知難則退進止自由故能發舒志意
盡其所長自岑徐出關不免有蔑視之心劉軍始依違觀望又
受兩帥節度不能審機應變以致終無成功不僅大吏吝其餉
械爲掣肘已也念此爲之三歎 丁衡三屢請聯結雲南土司
爲已任意以內消覬覦外固藩籬峴帥信之請令署理雲南提

督以責成效朝議因實缺有人不應指缺保奏不報也既返旆江南覬帥又以請假事權撫慰土司爲言然既不署雲南提督又不別開生面權輕餉絀憑何辦事窮邊既無智深勇沈之將樞府又無破格用人之心英法通商事變方亟介在兩大異日何以自全然能保丁之勝任愉快則亦未可知也 十五里至黎里爲鹽梟由金山衛過往要道湘軍前營前哨參將謝明佳率勇三隊駐此外駐有新中營右領哨千總郭運宏右四艙長六品軍功楊春廷右五艙長六品軍功劉國光又右營左哨二隊升用守備千總杜承發由蘆墟換防至七里灣路過來見係江甯人 中丞所定新章師船三月換防一則使周知各處地

勢民情以練其識一則使其不時更換以勞其力一則免其久駐一隅沾染習氣法良意美也 黃一桂來談某統領川盛長子王康南事最詳余謂某因戀戀於鹽捕營終以自累思梟匪之出沒無常而不能選將購線以爲地方長久之計徒欲苟安目前始思羈縻一二巨梟以靖其黨終則聽其呼朋引類轆轤紛紜而不能制事愈壞而護之愈深隱忍遷就卒橫決而不可收拾熊文燦之撫張獻忠勝克齋之袒苗沛霖皆此智也 二十六里至蘆墟湘軍前營補用都司右哨哨長何家揚率勇二隊駐此外駐有留防右營左哨四隊哨弁汪世荃年未三十向在耶陽鎮綦高會處當差詢以軍事所答多非所問新中營右

哨三隊五品軍功袁厚年與汪年相若湘鄉人曾忠襄以鄉誼薦之凌問樵凌委儀棧令其帶船護卡云又駐有新中營右哨六隊守備銜千總巢名鉅軍營中五六品軍功不過如耆民之頂戴榮身其年齒已長者碌碌無能或統領營官憐其老邁遇有稟請功牌機會爲之附名卽委以事亦不能辦其少年則統領營官之當內差者居多或因差使伶俐有意栽培或因親故力薦情面難却臨委事時給以空白功牌填給收執此種人抵應酬有餘穩練不足彼亦居然帶一哨一隊爲衆人之長平時無所短長遇事必致遺誤其中雖未必盡無可取而開倖門以用便嬖賢者不爲也 十二里至金澤宿相傳梟匪光蛋